

東

華

錄

東華錄卷之九

湘源蔣良騏千之父

康熙二年二月湖廣提督董學禮疏報前奉命會勦湖廣山西巨寇李來亨馬騰雲党守素等隨同總兵穆生輝于大海高守貴鑿山開道追至李家店擒偽總兵宋段斬獲無算賊焚巢遁又別將恢復歸州巴東巫山等處 陝督奏提臣王一玉率總兵于奮起鮑敬追勦逆賊郝搖旗于房縣橫水敗偽軍門羅么 十一日庚戌亥刻慈和皇太后崩 十九日京師天鼓鳴隨隕星十一城外七城內四

次朝拾視熱如熾炭 三月命廣東總督移駐廣州府

川督報偽岐侯賀珍偽富寧伯賀道寧等納款 四月湖

廣提督董學禮報同各鎮破李來亨于長坪 二十二日

未刻遼陽殺布台陡起黑風一股從南向東吹倒民房四

百三十餘間壓死男婦五百餘口 六月兵部議覆李定

國子李嗣興從邊外投誠得旨授都統品級 八月禮部

議覆鄉會考試停止八股頭場策五篇二場四書及五經

論各一篇表一篇判五道以甲辰科爲始從之 以流賊

餘孽郝搖旂劉體純李來亨等竄伏鄭義山中命都統穆

星瑪爲靖西將軍都統圖海爲定西將軍同都統宗室穆
琛護軍統領孫達里都統覺羅巴尔布護軍統領科尔昆
率大兵征勦 九月命都督噶褚哈爲鎮西將軍同都統
光泰統滿兵鎮守西安以西安將軍傅喀禪往征西山故
也 十月川督李國英報巨寇劉二虎李來亨郝搖旂袁
宗第黨守素塔天寶馬騰雲七家出犯巫山乞發大兵勦
滅 福督李率泰奏官兵會勦延建賊首王鉄佛等擒之
又疏報提督施琅遣守備汪明等敗海寇于海門斬僞
副將林維等 十一月刑部議覆原任按察使宋琬通同

于七謀反一案 旨宋琬等原無通賊情節著免罪

十二月耿繼茂李率泰奏十月臣等統兵渡海攻克廈門
賊眾驚潰登州提督施琅會荷蘭國夾板船邀擊之斬千
餘級乘勝取浯嶼金門二島鄭錦周全斌等遁 耿繼茂
奏十月總兵王進功敗海寇于雲霄鎮

康熙三年正月川督李國英報西安將軍傅珪禪副都統
杜敏會同提督進剿蜀中巨寇于康熙二年十二月二十
三日師次陳家坡奮勇剿殺賊遁入天地寨杜敏等統兵
追剿劉二虎勢窮自縊郝搖旗袁宗第夜遁杜敏等復追

至黃草坡大敗賊眾擒郝搖旂袁宗第並僞晉王朱宗演等
吳三桂疏進勦廣西隴紂山寇生擒妖人阿仲逆寨
悉平 二月耿繼茂疏官兵攻克長腰東蚶二島僞兵部
阮春雷逆渠張煌言僅以身免 西山巨逆馬騰雲党守
素塔天寶歸誠 三月吏部奉 上諭議奏大學士缺以
各部尚書左都御史推補如不用以各部侍郎學士推補
各部尚書缺照衙門次序以尚書左都御史轉補如不用
以各部侍郎推補吏侍缺以各部侍郎轉各部侍郎缺以
學士左副都通政使大理卿宗丞推如不用以府尹太常

卿推左副都缺以通政使大理卿宗丞推如不用以府尹
太常卿推如不用以光祿卿推如不用以左通推通政使
大理卿缺以府尹太常卿推如不用以光祿推如不用以
侍讀學士左右通大理少照考語俸次推府尹太常卿缺
以光祿卿推如不用以左右通大理少推如不用以太常
少鴻臚卿太僕少督捕理事官照考語俸次推光祿卿缺
以左右通政使推如不用以太常少太僕少鴻臚卿督捕
理事官照考語俸次推其小四品京堂缺將每年內陞京
官四員用完後用五品京堂一員再用內陞司道一員得

旨學士既推侍郎以後大學士缺停其推用餘悉依議
四月定例公下副都統以上出征臨陣接戰時墜馬人
有以馬與騎者賞資銀一百兩叅領以下銀六十兩平人
銀二十兩康熙七年八月兵部尙書噶楚哈龔鼎孳等議
覆崇德年間例副都統以上衣服一襲馬一匹叅領佐領
馬一匹白身給牛一頭奉 旨 太宗因馬牛價貴獎
勵以馬與墜馬之人騎者定有給衣服馬牛之例今馬牛
價賤如仍照舊例似屬太輕著照現行例行 紅本 五月
耿繼茂疏報三月初六日與督臣李率奏提臣王進功海

澄公黃梧等領兵先後至八尺門僞將軍翁求多率兵民六萬降十四夜半渡海進拔銅山降僞侯黃廷僞都督金寬等兵民三萬餘口鄭錦遁走台灣 命廣西提督自梧州移駐省城 七月以福建提督水師總兵施琅爲靖海將軍往勦鄭錦 八月浙督趙廷臣疏逆渠張煌言盤踞浙海多年抗不就撫借名歸隱徜徉海外臣密令守備徐元張公午扮成僧民獲沽口林生陳滿等知煌言現在懸山花嶼卽駕所獲賊艘乘夜進小港從山後覓路突入帳房遂擒煌言及其親信餘党搜出僞視師兵部銀方印一

順僞關防九顆 湖廣督張長庚疏李來亨擁眾茅麓山
最爲峻險靖西將軍穆里瑪定西將軍圖海等率禁旅與
三省兵合勦晝夜環攻李來亨窮迫自縊舉火焚巢餘黨
蕩平 十月彗星見翼宿度指西北方 先是給事中楊
龍劾奏康熙二年順天鄉試春秋題目邪字誤和入將考
試官白乃貞詹養忱同考官羅繼謨革職等命將貼出寫
子字三人覆試俱不合不錄 靖南王耿繼茂請令其子
和碩額駙耿精忠赴閩學軍事尤之 入旂都統以下武
職各官鎮守省城將軍以下武職各官順治年間俱由吏

部題補康熙三年歸併兵部

紅本

十一月穆里瑪等死

師彗星犯井宿

丙午彗星犯胃宿

彗二

月壬戌彗星在奎宿度形漸小

給事中楊雍建言本年

十月初旬彗星見經五十餘日歷一十二宿白光驟然竊

念上天垂象示儆乞力圖修省廣求直言無難轉災爲福

得旨楊雍建直言可嘉今惟力圖修省以合天心甲

戌金星生白氣長三丈

康熙四年二月吳三桂奏總兵劉之復李世輝等於三年十一月自大方烏蒙進征永西大破之於波羅箐追兵至

法地屯生擒上司安坤 己巳彗星見女度 三桂報官
兵克烏撒土酋安重聖安重乾就擒 暹羅國主森列拍
臘照古龍拍臘馬嘽陸坤司由提呀菩埃遣陪臣航海具
表進貢 乙酉彗星在壁一度三十分尾長五尺餘求直
言 三月戊子午刻京師地震有聲 己丑彗星見行人
奎宿下詔肆赦 辛卯金星晝見 密諭尚可喜嚴束所
屬官兵以廣東人民爲王兵丁擾害甚苦失其生理也
四月十七日武林富陽縣太平村風日晴朗忽于巳刻
黑有石墮地聲如雷折爲二重數百斤 五月初八日山

西省城雨霜三日色青所雨之處草木盡枯 六月癸三

桂言遼東土酋王耀祖等于本年三月竊據新興僭號大

慶謀犯省城分遣賊黨攻陷各府縣總督卞三元等分兵

勦捕四月初七日擒耀祖各州縣俱恢復 八月庚申廣

東陽江縣地震有聲 九月甲申山西太原府地震 九

月初八日辛卯

上大婚禮成皇后阿舍里氏內大臣噶布喇女二十五日

戊申加上

太皇太后徽號曰昭聖慈壽恭簡安懿章慶敦惠溫莊字

太皇太后

皇太后徽號曰仁憲恪順

二字加

皇太后

恩欵五條

十月丁丑戌時湖廣常德府地震有聲

康熙五年正月兩江總督卽廷佐報十八日溧陽縣民瘡

河獲玉璽一顆上有篆文人心惟危至介執厥中十六字

命貯內庫賞獲璽人顧起龍等各銀伍拾兩 三月平西

王吳三桂報勦土司蔣昌賢于隴箐取寨數十迤東土賊

俱平設開化府永定州 六月添設六科滿漢給事中各

一員 七月復科場入版文經書策諭三場舊制從侍郎

黃璣之言也 八月給事中張維赤請擇吉親政報聞

十一月先是睿親王將廂黃旗應得之地給與正白旗而給廂黃旗地于右翼之末二十餘年旂民安業及廂黃旗鰲拜與正白旗蘇克薩哈同輔政有隙鰲拜故立意更換命大學士蘇納海侍郎雷虎會同巡撫王登聯總督朱昌祚酌議圈換至是朱昌祚王登聯奏言圈地不便旂民交困請停止輔臣稱旨將蘇納海朱昌祚王登聯皆拏禁十二月刑部議蘇納海撥地遲誤朱昌祚王登聯紛更妄奏應鞭一百籍家產

上召輔臣詢問蘇克薩哈不對鰲拜案尼遇必隆堅奏應
置重典

上未允鰲拜出稱旨蘇納海朱昌祚王登聯情罪重大着
卽處絞籍家產

康熙六年正月定王貝勒等執事人役衣服俱用綠色

二月吳三桂報官兵進剿烏撤生擒女酋隴氏及逆黨萬
餘人 四月江南奸民沈天甫呂中夏麟奇等撰逆詩二

卷詭稱黃尊素等百七十人作陳濟生編輯故明大事

吳姓等六人爲之序沈天甫使夏麟奇詣吳姓之家中

吳元萊所索詐財物元萊察其書非父手蹟控于巡城御史以聞下所司鞠訊沈天甫等皆棄市其被誣者不問

初七日陝西邠州等處黃風竟日地生黑虫十七日揚州霜 刑部議覆御史田六善言近見奸民捏詞詐害在南方不曰通海則曰逆書在北方不曰于七賊黨則曰逃人謂非此不足以上聳天聽下怖小民請飭督撫卽於審理情實者據實奏聞情虛者依律反坐如不候督撫審結徑來叩閭者依光棍例治罪查定例不候原官審結徑行叩閭者旗人枷號兩月鞭一百民責四十板流三千里從之

五月丙午諭吏部等衙門民爲邦本必使家給人足安
生樂業方可稱太平之治近聞直隸各省民多失所疾苦
顛連深可憫念或係官吏貪酷朘削窮黎抑或法制未便
致民失業果何道以遂其生耶一切民生利病應行應革
爾內外各衙門大小文武等官念切民依其各抒所見毋
隱吏部覆御史李棠奏例監考補中書三年後卽陞部
屬進士舉人仍遲至十年之久始得官職應行停止將各
科進士咨取考試得旨各科進士不必拘年分前後人
數有愿考者預行選取堪用者遇缺卽補七月

上躬親大政御太和殿羣臣表賀宜詔天下恩欵十七條
太子太保內大臣蘇克薩哈奏求守陵輔臣等稱旨蘇
克薩哈不識有何逼迫之處著王大臣議奏未幾允議將
伊子孫並本旗兄弟俱拿問旣而議上蘇克薩哈二十四
罪俱實應凌遲處死上不允鰲拜強奏累日竟坐處絞其
子查克且凌遲處死叔弟姪皆斬決 奉

世祖章皇帝

太祖

太宗配享園邱方澤着于冬至舉行

上既親大政命吏部具列部院大臣職名親加甄別會禮
部有題取賁詔奉差官員違例冒濫事特旨嚴飭并諭吏
部曰李若琳身任禮部尙書僉檢專擅與馮銓交結親密
朋比爲奸着革職爲民永不敘用 漕督屈盡美疏言現
裁推官漕糧乏員監兌臣以通行各省令知府監兌以速
清務上以盡美不請旨擅通行下部察議尋議于同知通
判內斟酌委用盡美降二級准抵尋疏楚省有漕府分同
知俱有清軍及經收版稅之責糧務乃通判職司應專責
監兌從之 九月雲貴總督卞三元提督張國柱李本深

合詞請吳三桂仍總管滇黔事務得 旨該藩以精力日
減奏請故允行若令王復理事務恐其過勞以致精力太
損如邊疆軍機要務王自應料理 十月己卯奉天府承
德縣地震有聲 十一月上

太皇太后徽號曰康和

皇太后曰誠頒恩天下以

世祖配天禮成故也

康熙七年四月癸巳申刻金星見午位色微暗下詔修省

五月癸丑子時京師地震

初七初九初十三
日未末時皆震

六月山

東地震 癸酉金星晝見 七月命鄉會試仍以八股文
取士 革職酒督恭順侯吳惟華密疏請征各州縣鎮市
房號銀兩及江南三十餘州縣令民納價領種 上惡其
害民歛財交刑部議罪 八月命都統內大臣大學士尙
書精奇尼哈番以上各照實級用棍傘行走護軍統領前
鋒統領副都統侍郎各照職掌品級用執事行走 九月
庚子金星晝見 十月治理厯法南懷仁劾奏欽天監監
副吳明燬所造康熙八年七政民厯內閏十二月應是九
年正月又一年兩春分兩秋分種種差謬 旨交議政王

等會議具奏

康熙八年二月議政王等會議前命大臣二十員赴觀象
台測驗南懷仁逐款符合吳明煊逐款皆錯南懷仁推算
九十六刻之法既合天象應自九年始將歷日推行尋推
八年閏十二月爲九年閏二月通行天下將現頒歷所載
閏不必看 三月授西洋人南懷仁爲欽天監監副以其
節氣占候符合也 四月丁丑幸太學 五月上以輔臣
公鰲拜結黨擅權弗思浚改命議政王大臣等逮治鰲拜
罪

上諭曰前工部尙書員缺鰲拜以朕素不知之濟世妄稱才能推補通同結黨以欺朕躬又奏稱戶部尙書應授二員將馬爾賽徇情補用又鰲拜于朕前辦事不求當理稍有拂意卽將部臣叱喝引見時在朕前施威震眾科道官條奏鰲拜屢請禁止恐身于物議閉塞言路凡用人行政欺朕專權恣意妄爲文武各官欲盡出伊門下與穆里瑪等結成死党凡事在家定議然後施行且倚仗凶惡棄毀國典與伊相合者則荐拔之不合者則陷害之朕念鰲拜舊臣望其改惡悔過今乃貪聚賄賂奸党日甚上違

君父重托下則殘害生民種種惡跡難以枚舉其嚴拿勘
審過必隆同列輔政明知其惡而緘口不語阿南達班布
爾喜党惡其子那摩佛姪塞本得并令法司逮問

康親王傑書等勘問鰲拜罪欵三十過必隆罪欵十二阿
南達班布爾喜罪欵二十一那摩佛罪欵十二塞本得罪
欵六

上親加鞫問情罪俱實諭曰鰲拜以勲舊大臣受恩深重
皇考遺詔輔佐政務理宜精白乃心盡忠圖報不意結党
專權紊亂國政紛更成憲罔上行私朕久已悉知尙望其

改行從善克保功名以全終始乃近觀其罪惡日多命諸
王大臣公同定審俱已得實以所犯重大擬以正法本當
依擬處分但念鰲拜在累朝効力年久旦

皇考曾經倚仕朕不忍加誅姑從寬革職籍沒仍行拘禁
遇必隆知鰲拜樹黨亂政不豫行糾劾故坐之罪今念其
爲

皇考顧命大臣且勲臣子其咎止于因循瞻顧未嘗躬負
重愆特爲寬宥仍以公爵宿衛內廷阿南達免死宗室班
布尔喜統那摩佛亦免死革職拘禁素木得立斬阿思哈

噶褚哈穆里瑪泰壁圖納莫俱立斬餘各從輕治罪

給還蘇克薩哈等原官及白尔黑圖等官職 六月禮科
給事中吳國龍奏今日百姓誠有二病如

上諭財盡力窮民不聊生矣但疾苦固多端而催科較甚
拯救鮮良法而除豁爲恩請自康熙八年以前軍民尾欠
錢糧盡行蠲免以豁窮黎尋部議查順治十八年以前拖
欠錢糧于康熙四年盡行蠲免而康熙元年以後拖欠錢
糧若再行蠲免恐不肖有司知其頻蠲將已征在官者作
爲拖欠希圖倖免難以議蠲得 旨依議 又左都御史

馮溥請收夏稅定于六月秋糧定于十月刑部侍郎王清
請征糧之期限于五六月完五六分九十月完五六分戶
部尚書郝維訥侍郎艾元徵嚴正矩請將夏稅定于五六
月秋糧定于九十月征收 兵部尚書王宏祚言本年存
剩之銀可撥次年春季之餉請少寬征糧限期尋戶部議
未便准行 旨這錢糧夏秋征收本當允行但國用尙在
不敷俟錢糧充足時戶部奏請舉行 又御史趙璟遵旨
條奏查順治四年所定官員經費錄內各官修葺心紅等
項比今俸銀數倍之多猶爲不足一旦裁減至總督每年

支俸一百五十五兩巡撫一百三十兩知州八十兩知縣
四十五兩計每月支俸三兩零一家一日粗食妻飽兼喂
馬匹亦得費銀五六錢一月俸不足五六日之費尙有二
十餘日將忍飢不食乎不取之百姓勢必飢寒若督撫勢
必取之下屬所以禁貪而愈貪也夫初任不得已畧貪下
賄賴賄以足日用及日久賍多自知罪已莫贖反恣大貪
下官行賄以塞上司之口上司受賍以庇下官之貪上下
相蒙打成一片臣以爲俸祿不增貪風不息下情不達廉
吏難支請勅查取原定經費銀數及額設款項從長會議

或將本省應征稅銀與折納鹽銀加增官員俸祿得旨
該部知道 諭戶部朕續承丕基乂安天下滿漢軍民原
無異視比年以來復將民間房地圈給旗下以致民生失
業深爲可憫自後圈占民間房地永行停止其今年所已
圈者悉令給還 七月昭雪蘇納海朱昌祚王登聯各賜
諡蔭子 刑部議吳明煊罪 旨從寬責四十板 戶部
等衙門題爲請復存留錢糧以杜苛派以安民生事戶部
尙書郝維訥侍郎艾元徵嚴正矩遵旨陳奏康熙七年酌
省存留一案在議者以杜支勿給一裁減而所得實多殊

不知我朝定鼎以來屢經裁汰覓在所存之數萬難再減
且地方費用不足勢必仍派諸民貧乏之輩借口橫加民
財愈盡矣卽如進表朝覲以及鄉飲科場等款皆係大典
修理城垣倉庫製造軍器火藥等款皆係要務至于教官
馬匹草料一裁則寒墮有步行之苦舖兵塘馬工食一裁
則貧役有枵腹之悲孤貧獄囚口糧一裁則殘獨無以自
存而有罪者不得邀矜憐于法外況各省存留錢糧臣部
據實核確應用實數方准銷帑原未嘗任其胥吏則七年
議裁各款似應于九年爲始照舊復其存留至于應裁自

糧水腳改征漕糧折色一款請勅總漕等確查有無累民
可否久行據實具題可也 又刑部尙書朱之弼題爲請
復存留錢糧以惠民生事生民疾苦大事莫過于康熙七
年酌省存留錢糧一案夫存留錢糧原留爲地方之用裁
一分則少一分地方官事不容已不得不又派之民間且
不肖有司因以爲利是又重增無限之苦累矣乞勅部察
核康熙七年以前存留數目仍令存留則百姓可免重派
之累 又御史連國輔題請復裁減各項必需之錢糧以
培國本以甦民累事臣伏見康熙七年戶部裁減各項錢

糧內有必不容裁減者如學道一考生員歲季考等銀舉人進士盤費匾額等銀此朝廷作養人材之需也如鄉飲酒席此優禮耆老之需也如修理城垣此未雨綢繆之需也他如各官心紅紙張由單造冊併看守監倉及鋪兵工食等項無一項非必需之費一旦悉爲裁減不知旣無錢糧動支又無別項設處勢必科派民財以充費用嗟此三空四盡之餘何堪此額外誅求乎乞勅部確查議覆奉旨該部議奏等戶部議奏臣等查直隸各省原額存留銀共一千六十九萬三千八十五兩零除駙站河夫漕銀四百

二十四萬一百三十三兩零實原額存留銀六百五十五萬二千九百五十二兩零向因兵餉不敷通其裁過銀三百一十六萬五千三百四十六兩零尙存銀三百三十八萬七千六百六兩零又于康熙七年裁銀一百七十四萬四千三百六十九兩零止實在存留銀一百六十四萬三千二百三十七兩零各省除荒之數俱在此內臣等會議其康熙七年所裁各款自九年爲始復其存留 旨依議其白糧水脚每石八錢並經費等項照舊全留又漕米內改折校子米十五萬石不便改折應仍舊 八月康親王

傑書等議覆南懷仁等呈告楊光先依附齎拜捏詞陷人
將歷代所用之洪範五行稱爲滅蠻經致李祖白等各官
正法援引吳明煊疏奏授官誣告湯若望謀叛情罪重大
應擬斬湯若望應復通元教師之名得 旨楊光先年老
姑從寬免死其天主教除南懷仁等照常自行外所有直
省復立堂入教仍着嚴行禁止 九月甲午寅時京師地
震有聲 山東邱縣孝子王祚昌刲肝療父父病立起
特旨給旌後不爲例 漕督帥顏保疏言淮安爲水陸孔
道乃十五里內連設三關其板閘鈔關與淮安倉之稅戶

部差員征收清江廠船料等稅工部差員征收胥役繁多
商人耗費多端稽延時日請以三關額課歸併一關征收
則胥役減而商民俱便下部議戶部言淮安倉稅應歸併
淮安關工部言清江廠之稅爲修造漕船經費宜分征如
舊制

上以廠稅歸併一關亦不致虧課命丹議應如帥顏保所
請 十月以重修盧溝橋告成 御製碑文 十一月太
和殿乾清宮告成 御殿行慶賀禮

上由武英殿移居乾清宮頒詔天下恩數十五條

康熙九年正月復遇必隆公爵 二月諭刑部盜案內論死者甚多其爲誣引株連亦或有之宜加詳勘至於夾棍乃慘痛之刑必不得已而後可用其慎之毋忽 又諭刑部流徙尙陽堡寧古塔罪人衣絮單薄凍斃於路甚爲可憫自今十月至正月及六月俱勿遣 五月加上

孝康慈和皇太后爲章皇后升祔

太廟

康熙十年五月給事中姚文然言江南百姓羣集鼓廳保留總督麻勒吉且云麻勒吉自被鎖拿顏黑面削臣竊思

官列大僚免冠帶鎖愧辱雖堪乞特恩寬其鎖繫至於所犯事情審有實據自有應得之罪

旨說得是以後官員犯罪例禁鎖拿着永行停止 靖南王有疾奏以精忠代理藩務允之 六月甲午金星晝見

靖南王耿繼茂卒以其子和碩額駙耿精忠襲爵 十

二月召翰林院掌院學士博達禮至懋勤殿 諭曰翰林院起居注職任重大關係樞密朕以尔才品優卓實可信任故行簡用尔其勉以副朕意

東華錄卷之十

湘源蔣良騏于之父

康熙十一年七月副都御史李之芳疏言部院官夫察胥役犯贓應如州縣例革職時吏部尙書對哈納以部院官員例不開防胥役寢其議

上以京官雖與外官有間不應迥異下九卿科道會議尋議外官改罰俸一年京官應罰俸六個月得旨申飭令再議

上諭責對哈納曰衙役作弊小民受害無窮所司官理應

從重處分以清積蠹今尔等俱已富貴不念小民困苦惟
恐重處屬員致有干涉初議京官不應處分繼議外官亦
從未減明係瞻徇朕擢尔吏部尚書自應殫心爲國失公
報效乃全無主見殊負委任之意于是定議外官處分仍
督部院司官失察書吏犯贓不及十兩者罰俸一年過十
兩者降一級留任 八月王大臣等議覆御史孟熊飛疏
言孫可望係張獻忠餘黨擾亂邊陲後爲李定國所敗窮
蹙乞降前有重大之罪後無纖微之功我國家格外殊恩
授以義王顯爵及伊身死已襲替二次今孫繼澤故若令

再襲則後此世世冒濫無已應請停其襲替或降封應如
所請降授義公得 旨公止一義字於例不合再議降爲
慕義公 十二月 上召講官等至懋勤殿諭曰漢人中
有請金言官以風聞言事者朕思忠愛之言切中事理患
其不多若不肖之徒借端生事假公濟私人主不察必至
傾害善良擾亂國政爲害甚鉅 又

諭曰從來與民休息道在不擾與其多一事不如省一事
朕觀前代君臣每多好大喜功勞民傷財紊亂舊章虛耗
元氣上下訾謷民生日蹙深爲可鑒

康熙十二年三月土魯番入貢疏言臣國蹇遭變亂不能
進獻今地方稍平特遣兀魯和際于一千八百二十三年二月
二十八日遠貢方物

上御宏德殿諭諸官曰從來民生不遂由于吏治不清長
吏賢則百姓自安矣天下善事俱是分所當爲近見有寸
長片善便自矜誇是好名也又

諭曰有治人無治法但真能任事者亦難得朕觀人必先
心術次才學心術不善縱有才學何用 六月吏部尙書
對哈納疏言舊例各省司道府州縣召募經制書辦典史

攢典等役恐積久弊生一歲一次轉撥約有數萬人甚爲煩擾且致文冊生疎每多訛舛通漏請照督撫鹽院衙門之例五年役滿停其轉撥從之 平南王尙可喜疏請撤藩歸老遼東 旨嘉獎官兵家口作可遷移安插着會議 七月平西王吳三桂疏請撤藩 旨嘉獎官兵家口作何遷移安插着會議 靖南王耿精忠疏請撤藩 旨嘉獎官兵家口作何遷移安插着會議

上諭講官曰朕或出郊外或幸廟苑翰林院官員隨從鄉京城毫無資產屢從不免艱苦嗣後所用帳房及一切

應用物件酌定數目由內府給與 八月差禮部左侍郎
折爾肯傳達禮往雲南戶部尙書梁清標往廣東襄陽傳
郎陳一炳往福建經理各藩撤兵起行事宜 九月乙亥
京師地震 十二月差往貴州備辦夫解易模事在席中
党務禮員外郎薩穆哈馳驛回京奏稱雲貴總督甘文焜
言吳三桂於十一月二十一日殺雲撫朱國治以所部兵
反前差往侍郎折爾肯等被留

上召議政王大臣等諭曰吳三桂已反荊州乃咽喉要地
着前鋒統領碩岱帶同佐領前鋒一名兼程前往保守荆

州以固軍民之心並進據常德以遏賊勢其陸續遣發大
丘往勦之處着速議 川湖督蔡毓榮疏報吳三桂反僞
稱天下都招討兵馬大元帥以明年甲寅爲周王元年改
元昭武鑄錢曰利用通寶貴州提督李本深叛應之前差
往主事辛珠筆帖式薩爾圖不屈死總督甘文焜聞變將
十餘騎出貴陽府至鎮遠守將應賊圍之文焜自殺巡撫
曹申吉降賊賊逼鎮遠漸入楚境 停檄平南靖南二藩
召梁清標陳一炳還 奸民楊起隆詐稱朱三太子廣德
元年糾黨謀叛以白布裹頭紅布披身爲號約于京城內

外放火舉事潛聚鼓樓西街降將周全斌家全斌之子公
直首于正黃旗漢軍都統祖永烈永烈與正黃旗滿洲都
統圖海偕吉哈礼及佐領鄂爾遜等率兵圍之生擒其僞
齊肩親王焦三僞護駕指揮朱尙賢僞閣老張大僞軍師
李柱僞總督陳繼志僞提督史國賓僞黃門官王鎮邦等
數百人送法司鞫實磔于市楊起隆逃去 命多羅順承
郡王勒爾錦爲寧南靖寇大將軍都統多羅貝勒察尼都
統覺羅朱滿鄂內伯宜理布覺羅巴尔布等往湖廣 拿
禁吳三桂子吳應熊 詔削吳三桂爵宣諭雲南貴州官

員軍民人等

命都統葉赫爲安西將軍同將軍瓦爾達

等由漢中入蜀護軍統領胡禮布爲副將軍同往 上諭

兵部近聞京城小民驚恐欲于城外西山處所遷移逃避殊非朕安撫百姓之意前令緝獲假稱朱三之楊起隆與良民毫無干涉並無驅逐居民移居城外之事卽昨暫閉城門亦因有人舉首楊起隆潛藏大城之內故行嚴緝非有他故尔百姓勿妄聽訛言致生疑畏各安生業如平時尔部通行曉諭 命據尔坤移駐西安 湖廣督蔡維祺報賊兵已抵清琅衛通沅州請大兵馳救令提督桑維翰

馳赴沅協守

河南巡撫兼理河道佟鳳彩疏言豫省中

定有年百姓苦累未蘇每歲修築黃河用夫七八千名或至萬餘名自二月至十月俱按地畝起派似乎公矣然狡猾之徒以自已田土飛洒于人勢豪之家以他人地畝包攬于已甚至紳衿衙役借題優免致懦弱鄉愚愈累愈貧每月三四兩不等方能雇夫一名及解到河工又爲積年河工夫頭百計欺壓苦不能受勢必至于逃逃而提補又得二兩重雇是每夫一月已費至六七兩矣卽以一歲爲夫初雇月需三四兩而計每年費至三四十萬今莫若

官雇夫照順治十八年以前例每夫每月雇價二兩每歲上工九個月每夫止用雇價十八兩綜萬夫計之價止用一十八萬兩其每歲估夫若干需銀若干除歲征河銀外計通省地畝分別等則派銀足之刊明由單內我

朝制度比錢糧俱照明萬厯年間則例此項似爲加派而派夫較之派銀所費不啻數倍曷若稍一更變每畝不過加之釐毫俾得安心畝畝此歲修之議若是倘遇意外大工雇價浩繁或動何項錢糧又在臨時再行酌題者也疏下部議如所請行 旨派夫累民尤宜停止若派銀雇夫

仍屬累民着照順治十八年以前例支河庫銀雇給如有
不敷需動別項錢糧再行題請鳳彩又疏言均平里甲久
奉

諭旨通行直省惟河南荒多熟少因循加放雖有里甲之
名其實多寡不一多者每里或五六百頃少者每里止一
二百頃或寥寥數頃有司止知照例編差里大則田多戶
殷衆擎易舉里小則田少人稀難以承復更有官行戶名
或不入甲或入甲而不當差甚至避重就輕大里愈得便
宜小里愈增苦累今真若今州縣印官按現在征糧地畝

冊如一州縣有地一千頃原分爲十里者每里均分一百頃一里之中各分十甲每甲均分十頃遇有差徭按里甲分當則豪強無計躲避貧弱不致偏枯矣疏下部行又疏言豫省沿河地方雖云產柳然除堤柳園柳外俱民間納糧地栽種以供採辦自康熙七年以來協濟江南河工之柳已二百七十餘萬束矣而本省歲修常需百餘萬去歲開封府屬陽武縣之潭口寺工險事迫無柳可用將民間之桃李杏梨等樹盡行砍伐堵塞方保無虞是修防本省河工尙且不敷難以協運外省且豫省黃河水勢洶湧原

無商旅巨艦往來不過各河口寥寥之渡船耳一遇協濟
渡船不敷將小河民船從陸地挖溝引水拉至大河每隻
約裝柳二三百束然尙有船可運也今朱仙鎮市船見封
雇無已俱各畏縮不前大河又無片帆往來百姓運柳至
河干者祇望洋而歎官吏束手無策若不急圖變通將來
必至悞運現在協濟七里溝之柳九十餘萬束而堤柳園
柳官給脚價銀一分五釐民柳運運脚每束給銀四分五
釐向來運本省之柳修本省之工每束尙給銀五分今遠
運江南千里之外止給四分五釐小民無術飛運安得不

賠累乞勅河臣于江南雇船到豫使民止備辦柳束挽運
河干嗣後就江南隣近無河患處酌辦協濟留河南有餘
不盡之柳稍以備本省河患庶百姓稍得蘇息大工不致
遲悞矣疏下九卿科道議行 右都督寧夏總兵劉芳名
遵旨陳奏鎮兵事宜以寧夏孤懸河外延袤千里額兵屢
經調撥兵力單虛請自後征調缺額卽令招補以備守禦
又請以減等罪人僉發沿邊以資生聚並下部議行

康熙十三年正月遣都統覺羅巴尔布護軍統領伊爾度
齊額司泰率護軍驍騎先赴荊州 勒爾錦葉赫師行

改鄂善雲貴總督駐湖廣協勦 湖廣督蔡毓榮報賊于

十二月二十九日陷沅州總兵崔世祿被執澧辰路梗

上命順承郡王發驍騎馳赴荊州都統尼雅翰爲鎮南將

軍領德州等處駐防滿兵鎮兗州副都統馬哈達席布參

贊軍務侍衛奎塞自荊州馳還奏偏沅巡撫盧震奔長沙

奔岳州 命都統朱滿領兵速赴武昌 令江寧將軍額

楚鎮海將軍王之鼎各遣兵防守安慶並勅尼雅翰速抵

安慶總統諸師馬哈達隨征江寧 四川巡撫羅森提督

鄭蛟麟總兵譚宏吳之茂等以四川叛降賊

命總兵徐治都還守彝陵

以席卜臣爲鎮西將軍與副都統巴哈德業立守西安
援進川大兵 以趙國祚爲江西提督王永譽爲河南提
督 命副都統擴爾坤帥師赴漢中 二月

太皇太后出宮中銀幣犒軍 爲總兵楊寶應犯常德其
父原任提督楊遇明爲內應知府翁應兆從逆常德潰

以周有德總督四川張德地巡撫四川 賊犯澧州守卒

以城叛提督桑峨等退保荊州 以朝拜爲雲南提督趙

賴爲貴州提督進兵合剿 湖廣督報長沙副將黃正卿

等以城叛降賊 命都統朱爾璘守岳州 中諭大將軍

等嚴禁兵士侵擾百姓 授刑部尚書莫洛爲大學士經

畧陝西以陝西西控番回南通巴蜀恐吳三桂煽亂人心

搖惑故也 兩廣督金光祖報廣西將軍孫延齡反自稱

安遠大將軍殺都統王永年副都統孟一茂等執巡撫馬

雄鎮幽之 三月吳三桂僞將劉之復陶繼智等犯彝陵

額司泰傳 順承郡王達護軍統領額司泰等擊敗之賊遁

回宜都 以華善爲安南將軍鎮京口 杭州將軍圖喇

報耿精忠反福建總督范承謨賊不屈賊幽之巡撫劉

秉政降賊 鄖陽副將洪福以所部叛提督佟國璠擊敗之 襄陽總兵楊來嘉附逆藩吳三桂踞穀城叛先是河北總兵蔡祿與來嘉並爲海賊鄭成功裨將成功死先後率衆來降並授左都督擢任總兵至是聯結謀叛蔡祿造烏鎗購羸馬令兵丁以捕魚爲名演習數月適奉使侍衛觀保偵得其狀以奏

上命阿密達率護軍恭領八員每佐領下護軍一名馳赴懷慶察視阿密達至祿不出迎集礮手以拒阿密達直入其屏擒蔡祿及其家口以奏

上手勅諭之曰尔行未踰旬克濟厥事以遏亂萌朕心深
爲嘉悅但人命至重須研審情實方可正法毋得株連無
辜至所俘人口散給士卒宜重賞被傷者以示鼓勵阿密
達遵旨鞠訊得蔡祿與楊來嘉遣人來往潛謀投順吳逆
且與子姪家人等私議若大兵來懷慶閉城以拒突圖往
踞太行山情狀以聞命將蔡祿及子姪同謀者俱正法
以內大臣希爾根爲定南將軍尙書哈爾哈齊副之統兵
赴江西以討耿精忠護軍統領桑噶更都侍郎覺羅舒恕
副都統根特巴圖魯席布魯其軍又以武昌有警命都統

覺羅巴爾布護軍統領伊爾度齊率師赴武昌 西安將
軍瓦爾喀等敗吳逆僞總兵葉某克復陽平關 四月奉
使雲南禮部侍郎折爾肯翰林院學士傅達禮還至武昌
攜有吳三桂奏章 上諭王大將軍等益加警備仍招致
之 賊將陶繼智復犯彝陵都統鄂內擊破之 調西安
副都統德業立總兵馬雲程高登科守襄陽 以喇哈達
爲鎮東將軍統兵鎮兗州副都統伯穆赫林甘度海疆
軍務 逮盧震諭死 吳三桂子應熊孫世霖伏誅
建告急 命副都統胡圖馬哈達率兵赴杭州 下

孫延齡職 尙可喜執吳三桂使人並逆書奏聞 以新

密達爲楊威將軍鎮江寧 以賴塔爲平南將軍統兵赴

杭州討耿精忠 潮州總兵劉進忠以城叛降精忠與續

順公沈瑞兵巷戰遂引賊兵入城 尙可喜奏獲孫延齡

檄有三藩並變之語臣與耿精忠爲婚姻今精忠反不能

不踰蹈于中臣惟捐軀矢志保固嶺南以表臣始終之誠

吳三桂遣賊兵一萬屯黃沙河若與孫延齡合勢益猖獗

請就近移師同臣勦賊 上諭王累朝舊勲性雋忠貞朕

心久已洞悉覽奏披瀝悃忱深爲嘉悅其益殫心勦禦以

副倚任旋命大軍之駐江西者分道會勦以根特巴圖

魯爲平寇大將軍討孫延齡兩江總督阿席熙疏言耿

精忠踞閩反叛賊兵一出汀州一出光澤與江西之贛州

建昌接據請撥現駐安慶滿洲兵赴江西分道勦禦又杭

州將軍圖喇以浙江兵力單弱咨請發兵赴援雖江南在

在需兵防守而隣封告急無容坐視已于提標及狼山鎮

標調馬兵二百步兵八百赴浙江聽候調遣下詔削耿

精忠爵詔以分遣禁旅調度情形奉平南王尙可喜回

今寧南靖寇大將軍順承郡王率大軍由常澧進平羅貴

鎮南將軍尼雅翰都統朱滿巴爾布等帥師由武昌水陸
進取岳州長沙直入廣西都統宜理布等帥師駐彝陵都
統范達禮等駐鄖襄安西將軍葉赫等由漢中取進四川
副都統橫爾坤等吳國楨駐漢中鎮西將軍席卜臣等駐
西安復遣尙書莫洛經畧三秦帥大兵居中調度鎮東將
軍喇哈達等於山東河南江南要地控制安南將軍華善
等於京口水陸駐防揚威將軍阿密達等防守江寧安慶
沿江險要平南將軍賴塔由浙江平定福建平寇將軍圖
喇駐杭州兼防海疆定南將軍希爾根等亦由江西平定

福建吏部侍郎覺羅舒恕副都統根特巴圖魯席布等往
廣東會王進勦一切机宜王共叅酌以行 尙可喜疏言
臣家子中惟之孝堪繼臣職至軍机事宜雖衰老尙能指
揮調度不致有悞封疆 旨嘉獎封可喜平南親王授之
孝平南將軍 五月

皇后阿舍里氏崩 安西將軍葉赫等自漢中抵七盤關
被賊于開口及種子舖山下進抵朝天關敗吳三桂僞總
兵石存禮于劉閣舖山下復朝天關 平陽兵總執獲
蔡朝佐以叛與耿精忠僞將會養性令圖瑞安俞將軍

塔等率師討之 副都統德業立大敗叛將洪福于武備山下 宣大總督馬之先疏言大同民貿易專用錢故征糧銀錢兼收成規已久若遵部文盡征銀于民不便請漸征錢以配兵餉部議從之 六月遣郎中周襄緒等奉詔往福建招諭耿精忠 命戶部侍郎達都赴浙江督理大兵糧餉 授多羅貝勒尙善爲安遠靖寇大將軍帥師赴岳州固山貝子準達等帥師赴荊州 江西撫董衛國報叛逆柯昇勾連閩道竊踞廣信諸處麻蓬地方賊兵繼起 諭定南將軍希爾根與根特巴圖魯席布等合勦之

總兵祖宏勳以温州叛 耿精忠僞將李雲龍犯常山開
化金華副將牟大寅擊敗之斬其僞叅將張雄 命將軍
喇哈達鎮守杭州 孫延齡犯柳州馬雄告急 詔尙可
喜金光祖發兵援之 命將軍賴塔進取福建 以陳洪
明巡撫廣西以和碩康親王傑書爲奉命大將軍統兵赴
浙江多羅貝勒董額爲定西大將軍統兵赴四川 冊諡
大行皇后曰仁孝皇后 浙江温州羅清黃岩太平諸營
相繼叛 詔將軍喇哈達調兵守台寧 江西巡撫董衛
國報耿逆遣賊李連李太等犯建昌杉關官兵擊敗之

七月以耶廷佐總督福建臣應舉爲隨征福建都督 疾
將劉進忠遺其黨據程鄉縣官兵擊敗之復其城 南瑞
總兵楊富謀通賊事覺伏誅 耿精忠陷石城聲言犯寧
都命將軍希爾根等嚴守贛州以趙應奎充袁臨總兵防
袁州 精忠僞將閻標犯金華將軍喇哈達遣副都統鄂
申巴圖魯擒斬之 吳三桂僞將劉之復犯宜都副都統
蘇虎濟等擊敗之 大將軍勒爾錦遣貝勒察尼將軍尼
雅翰等分水陸進攻岳州敗賊將吳應麒于七里山 副
都統馬哈達雅達理敗賊于金華 浙督李之芳報賊合

力犯衢州臣兵卑可虞命喇哈達速赴衢州 四川督周

有德報僞總兵彭時亨犯廣元副將張登科等敗之 董

衛國報闖賊犯寧都遊擊周球等擊敗之 八月遊擊周

球等復石城 江西饒州營兵變 李之芳報都司姚世

熙等大敗耿逆于衢州杜澤大洲等處又耿逆勾連土賊

從處州逼金華副都統鄂申陳世凱擊敗之 命總督蔡

毓榮協勦湖南順承郡王嚴兵守荊州 叛將劉進忠党

劉斌據普寧我兵進勦賊迎敵被陷知縣段藻閉門拒之

復其城 賴塔報七月賊犯金華副都統喇哈等九戰皆

捷復諸暨義烏二縣 李之芳報遊擊王世望等敗賊于
龍游副將鮑虎復壽昌 李之芳報新昌知縣陳大興殺
賊全城紹興知府許元勲守備吳良駿等敗賊于城外賊
遁犯仙居都司汪國祥敗之 命治歷法南懷仁鑄造輕
利火砲以助大軍進剿 海澄公黃梧卒子芳度僞降賊
募舊兵斬賊將劉彩等三人固守漳城遣間使黃藍以聞
且請速救 詔褒之令襲父爵以其兄侍衛黃芳世爲隨
征福建總兵官令同尙可喜進剿 護軍統領桑遏等敗
耿逆兵于撫州 襄陽總兵劉成龍下荆南道石琳率兵

攻勦南漳縣天門寨賊安撫各寨洞 官兵復梧州 總

兵李榮勦賊金華焚其木城副將鮑虎砍賊五營復淳安

賊圍黃岩甚急又寧海象山新昌餘姚四縣賊衆蜂起

請速救台州保寧海 旨著將軍賴塔喇哈達商酌行之

飭隨營蒙古兵違法掠民者罪死 江西官兵復萬年

縣 浙江副將鮑虎復遂安叅將洪起元復嵎縣命護軍

統領桑遏移師駐袁州 上諭王大臣聞岳州三面臨湖

賊於陸路一面設濠築壘據守頗堅詔將軍尼雅翰移師

江西與副都統甘度海等合兵自袁州進取長沙夾攻岳

州 兩河隄工告竣加河道總督王光裕兵部尚書銜

李之芳報副都統胡圖副將王庭梅敗賊于石梁大溝源
總兵李榮復東陽 九月以饒州賊犯婺源等處命副都
統碩塔穆森以鎮守兗州滿洲蒙古驍騎移駐江寧 江
西總督董衛國報吳逆僞將軍率獫狁犯長沙糾羣賊窺
袁州

上命將軍希爾根哈爾哈齊總兵趙應奎併力勦禦尋賊
陷都昌復諭希爾根等剿之 叛賊楊來嘉犯南漳官兵
敗之 賊逼祁門改命碩塔等駐紮調河南提督王永

譽爲安徽提督 武昌知府于成龍督兵擒殺賊首鄒君
升副都統尙之節復大埔 偽將軍吳之茂偽總兵彭
士亨犯廣元官兵大敗之賊夜遁去 尙可喜報劉進忠
抗不受撫官兵屢敗之斬偽副將陳璉等 賊陷徽州府
及歙祁等縣 江西督董衛國報副都統甘度海大敗賊
于龍泉縣西北斬偽總兵郭龍李良 又報希爾根哈尔
哈齊等圍撫州擊敗援兵及城內兵 浙江提督塞白理
奏賊陷黃岩總兵阿尔泰從賊 吳逆遣賊犯袁州 諭
署副都統穆成格率南昌兵速赴袁州與趙應奎併力固

守 授和碩簡親王喇布爲揚威大將軍率滿兵往江寧
保固江南全省將軍阿密達額楚華善王之鼎總兵阿席
熙並叅贊軍務授坤巴圖魯侍衛爲振武將軍赴汝寧駐
防 浙撫田逢吉報賊屯仙居縣朱溪都司汪圖祥知縣
鄭錄勲會勦殺三百餘 南贛總兵劉進寶復崇義 川
陝總督馬之先疏報流賊張獻忠餘党冉秉乾等投誠請
照例安置 將軍額楚敗賊下績溪復其城 希爾根復
無州尋奏閩賊東踞建昌滇賊西犯袁州令哈爾哈齊援
袁州 李之芳報副將陳世凱副都統馬哈達石調聲敗

僞都督陳重僞總兵朱老四等于金華之山口追至鄭家店斬五千餘級焚賊巢二百餘處 四川督周有德報僞將軍何德成自昭化赴二郎關欲截糧餉官兵擊敗之擒僞都司賀騰龍 兩廣督金先祖報提督馬雄總兵郭義降賊廣西全省變動命安親王岳樂爲定遠平寇大將軍率兵討之 額楚復徽州命速取道進饒州會合江西大兵 董衛國報賊犯建昌總兵劉進寶調屯壘都督許貞救援大破賊衆又賊曾若干犯石城中軍營天祥知縣李德明等率民兵敗之 十月閩賊犯建安副將鮑虎大敗

之 僞將軍陳昇土賊郭應定等犯賴州副都統甘度河
大敗之斬僞總兵柯隆李梁又追敗之于龍泉縣石灰溝
隘口破其三營攻取曹林賊巢十餘寨 十一月貝勒阿
善等奏十月二十六日夜大雨風將沙船戰船漂沒三
十餘隻冲去未獲滿洲兵二十五名砲手七十一名水手
家人十六名 旨貝勒大臣速議具奏 副都統賴塔穆
森等復建德 賊陷湖口彭澤浮梁鄱陽諸賊嘯聚日衆
命副都統雅頤阿喀尼馳赴勦賊 陝西督哈占報參將
陳應奎等夜襲賊于寧羌州 文廟山賊大亂遁回南山

康親王疏報偽都督周烈偽總兵蔡明等率賊二萬由常山謀犯衢州副都統喇哈胡圖等九月十七日擊敗之于焦園等處 徽州營副將姚宏信守備李剛大敗賊于建德縣之鄭坑舖 十二月經畧莫洛言廣元大兵缺餉兩月畧陽糧艘爲賊所劫賊又屯踞七盤朝天諸關餉道梗塞

上命速赴七盤朝天等處會將軍席卜臣勦賊疏通餉道尋總督哈占言蜀中水陸阻賊糧運難繼且賊窺伺平壤上諭貝勒董額經畧莫洛及周有德張德地等檄兵回廣

元再圖恢復 命副都統塞格等率滿兵駐河南 丁卯

申刻太白星晝見 鎮南將軍尼雅翰報偕副都統綽喀

托等于十月二十二日擊敗賊僞都督李大元等于南康

崖口恢復南康府 定南將軍希爾根報官兵恢復萬載

縣 撥京口沙虎船五十艘往岳州 湖廣督蔡毓榮報

逆賊楊來嘉陷竹溪中鋒寨 江西遊擊佟國棟等復新

昌縣 巳卯

大宗懿靖太貴妃薨 官兵敗僞都督徐尙朝等五萬衆

于金華城外 江西官兵敗賊于袁州西村 癸巳陝西

提督王輔臣兵叛于寧羌經畧莫洛遇害 大將軍貝勒

董額退保漢中 滇賊陷安福縣 諭貝勒尙書規取岳

州 命平寇將軍哈爾哈齊守江寧並叅贊大將軍簡親

王軍務 遺給事中蘇拜招撫王輔臣叛兵 命副都統

穆舒渾等率師鎮新安 以周卜世爲山西提督駐平陽

命將軍尼雅翰率所部兵協守廣東 孫延齡犯懷集

縣官兵六戰皆捷又犯月州遊擊王嘉賓擊敗之 士子

以勅諭王輔臣 河南撫佟鳳彩以疾乞休得 旨解任

調理南汝總兵周邦寧以士民籲留人告左都御史姚文

然疏言佟鳳彩相貌議論樸實無奇而老成練達謹慎和平服官二十餘年皆能稱職其撫豫數載恤民疾苦民愛而信之傳聞告病以來百姓皇皇如失所倚恃宜令力疾視事資駕輒就熟之益

上命鳳彩仍留任不爲例

東華錄卷之十終